

hommes de bien, elles les ont trahis, mais elles n'ont pas euité la punition de leur peché; on leur a dit entrez dedans le feu d'Enfer avec ceux qui y entrent. Dieu enseigne vne parabole à ceux qui ensuiuent sa loy, prenés exemple à la femme de Pharaon, elle a prié Dieu & a dit, Seigneur basty moy vne maison en Paradis, deliure moy de Pharaon, de ses œuures, & des personnes iniustes. Marie fille de Iosaphat a conserué sa virginité, nous auons inspiré nostre esprit en elle, elle a creu aux paroles de son Seigneur & aux escritures; elle estoit au nombre de celles qui obeysoient.

---

*LE CHAPITRE DE L'EMPIRE,*  
*contenant trente versets,*  
*escrit à la Meque.*

**A**V nom de Dieu clement & misericordieux. Louéz soit celuy auquel appartient l'Empire du monde, qui est tout-Puissant, & qui a créé la mort & la vie pour vous faire cognoistre quelle est la meilleure, il est tout-Puissant & misericordieux. Il a créé sept Cieux l'un sur l'autre, tu ne vois rien de ce qu'il a créé qui ne soit proportionné, eleue encore ta veüe au Ciel, tu n'y verras point de deffaut, regarde le deux ou plusieurs fois, tu n'y verras point de fente ny de manquement. Nous auons orné le Ciel & le monde d'E-

stoiles, nous en auôs chassé les Diabes, nous leur auôs  
 préparé vn grand brasier, & les tourmens de l'Enfer  
 pour les infidelles. Ils entendront des voix horribles  
 & espouuentables qui procederont de desespoir & de  
 colere lors qu'on les y precipitera, lors qu'ils entre-  
 ront dedans l'Enfer troupe à troupe, l'Intendant des  
 tourmens leur dira, n'avez vous eu personne en ter-  
 re qui vous ayt presché les peines de l'Enfer? Ouy,  
 diront-ils, on nous les a preschés, mais nous auons  
 dementy les Predicateurs, nous auons dit que  
 Dieu n'auoit pas commandé de faire ce qu'ils di-  
 soient, qu'ils estoient des menteurs & deuoyez du  
 droit chemin; si nous les eussions escoutés & si nous  
 eussions esté sages, nous ne serions pas aujourd'huy  
 au nombre des damnez; ils confesseront leurs pechez  
 dans le fonds de l'Enfer. Ceux qui craignent Dieu  
 sans le voir receuront pardon de leurs fautes & vne  
 tres-grande recompense. Parlez secrettement ou pu-  
 bliquement, Dieu sçait tout ce que vous auez dans le  
 cœur depuis que vous estes créés, il est beny & sçait  
 tout; il a estably les chemins sur la terre, allez de tous  
 costez & viuez de ses biens, vous ressusciterez tous &  
 serez vn iour assemblez deuant luy pour estre iugez.  
 Croyez vous que celuy qui est au Ciel ne puisse pas  
 rendre la Terre seche & aride & ne la puisse pas faire  
 trembler? Croyez vous que celuy qui est au Ciel ne  
 puisse pas enuoyer contre vous vn vent impetueux  
 pour vous exterminer? vous sentirez à l'aduenir quels  
 sont les tourmens de l'Enfer. Ceux qui vous ont pre-  
 cedez

cédez ne les ont pas voulu croire, & ont esté chastiez de leur incredulité. Ne considerez vous pas les oyseaux qui volent sur vos testes, comme ils estendent & ferment leurs ailles? rien ne les soustient que le misericordieux qui voit tout. Qui vous protegera dans vos malheurs autre que Dieu? Les infidelles sont des orgueilleux: Qui vous enrichira si Dieu reserre sa grace? neantmoins vous perseuerez dans vostre péché & fuyez la verité; celui qui marche renuersé sur sa face, est-il semblable à celui qui marche sur ses pieds dans le droit chemin? Dis-leur, Dieu vous a créés, il vous a donné l'ouye, la veüe & le sentiment, mais peu d'entre vous le remercient de ses graces; Dis-leur, il vous a créés de terre, & serez vn iour assemblez deuant luy pour rendre compte de vos actions. Les impies demandent quand fera le iour du iugement; Dis-leur, Dieu le sçait, ie ne suis enuoyé que pour vous prescher les peines de l'Enfer; Leurs visages deuiendront noirs lors qu'ils verront approcher la punition de leurs pechez. On leur dira, voila ce que vous auez demandé avec tant d'impatience; Dis-leur, auez vous veu que Dieu m'ait exterminé, & ceux qui estoient avec moy? au contraire, il nous a donné sa grace. Qui deliurera les infidelles des tourmens de l'Enfer? Dis-leur, Dieu est le misericordieux, nous croyons en luy, & sommes resignez à la volonté de sa diuine Majesté, vous cognoistrez à l'aduenir ceux qui seront deuoyez; Si l'eau qui abreue vos troupeaux entre sous la terre, qui vous donnera

d'autre eau, ou vne autre fontaine pour vous secourir?

---

*LE CHAPITRE DE LA PLUME,  
contenant cinquante-deux versets,  
escrit à la Meque.*

*Le Bedaoui intitule ce chapitre de la lettre O noun, n, & dit que c'est à dire Baleine ou grand poisson; Quelques autres Docteurs disent que O noun, n, est le nom de l'ancre ou de la table, sur laquelle les Anges escriuent les commandemens de Dieu, les autres assurent qu'il signifie escriptoire, mais vne bonne partie des Docteurs Mahometans intitulent ce Chapitre de la Plume.*

**A**V nom de Dieu clement & misericordieux. Je iure par la plume & par tout ce qui est escrit, que tu n'es pas demoniacle par la grace de ton Seigneur, tu auras vne recompense infinie, Dieu t'a creé d'vne creation haute & tres-illustre. Tu cognoistras à l'aduenir, & les infidelles aussi cognoistront vn iour ceux d'entre vous qui sont ignorans. Certainement ton Seigneur cognoit ceux qui sont deuoyez, & ceux qui suiuent le droict chemin; N'obeys pas aux impies, ils souhaitent que tu sois plus indulgent en-